

Maduro & Curiel's Bank na Curacao a premia Eduardo de Veer

Pa su inversion multi-miyonario den e proyecto Renaissance Curacao



TA for di momento cu MetaCorp, dirigi pa sr. Eduardo de Veer a anuncia e proyecto di Renaissance Resort, Casino & Mall na Corsow cu mesora e espectativanan a bira masha grandi mes. No obstante cu hopi conseho tabata negativo, mirando e situacion economico di-

ficil di e isla bisiña y e dificultad pa haya trahador, tog de Veer a opta pa sigui cu e proyecto aki. Awe, ora cu e proyecto ta avansando bon, e "spin-off" causa pa e isla Curasoleño y e animo contagioso cu MetaCorp a implementa na Corsow t'asina halto, awe por mira e frutonan

caba. Tur esaki, prome cu e proyecto ta cla mes!

Maduro & Curiels Bank, siendo un di e banconan mas grandi na Antiyas tur aña ta saca un premio na final di aña, conoci como e "MCB Prize". Esaki ta di 11 bez cu MCB na Corsow

ta entrega dicho premio na un persona of organisacion. Di acuerdo cu sr. Chicu Capriles, yui homber di e conocido Lionel "Paps" Capriles, siendo e actual Presidente di MCB: "No pa e parti material, sino pa e parti emocional y e parti di ki sorto di mensahe nos scogencia ta manda pa nos comunidad. Di e reaccion cu nos sa haña, sin kier broma, manera mi papa gusta haci, mi ta sigur cu tur biaha nos a duna un bon mensahe di cosnan positivo cu ta pasa riba e dushi pida baranca aki, cu nos tur ta yama Corsow".

Na momento di entrega e premio na sr. Eduardo de Veer, atrobe sr. Capriles a enfatisa cu: "E persona cu nos a scoge awe ta un bon brother di nos, pero cu tur respet, nos a scoge pa esey. Segun nos, Eduardo de Veer mas cu tur otro hende,

den aña 2007 a trece un confianza y positivismo nobo den nos desaroyo y den nos futuro economico. Tin mas cu tambe a yuda pero Eduardo toch ta otro. Aki ta trata di un entrepreneur masha exitoso di nos hermana isla Aruba, cu a tuma e curashi y e risico pa cuminsa den un tempo hopi slap na Curacao cu un proyecto multi-miyonario". Eduardo de Veer a bisa bon cla cu si e oportunidad presenta, cu e lo no duda ningun momento pa haci mas inversion na Corsow. "Nos a wordo bon ricibi y bon trata dor di tur hende."

Na final, sr. Chicu Capriles a termina e ceremonia oficial bisando cu "By the way, loke Eduardo ta trahando ta "really" una belleza y un 6 star hotel cu ora cu e ta cla henter comunidad ta bay ta masha orguyoso di dje. Eduardo....hopi danki pa Bo ehempel y pa Bo amistad."